

Scho 25 Jahr Opus-C-Voll eusi Gugge cha jubiliere  
do wet ich de Komedi als erschts natürlu au gratuliere  
zom Jubiläum händ si e Cd gmacht met erne neuschte Hits  
damets em nächschte Jahr en Nachfolger für de Schacher Seppli gits

Wir wollen sein ein einig Volk von Brüdern schwöre lut ond dütti  
sinerzyt 1291 drü Männer of em Rütli  
doch set em letschte 1. Auguscht do esch das Schnee von gestern  
sed det heisst leider wir wollen sein ein einig Volk von Schwestern

Eusi Politiker en Bärn die söll no eine kapiere  
d`Zigarette wänds verbüte ond de Joint legalisiere  
also du wenn die so witermached das esch s`paradoxe  
denn chonnt no die Zyt wo d`Martina Hingis ganz legal darf kokse

Woni enere Dütsche Metzgerey chörzlech ha Schofffleisch kauft  
do seit de Metzger no zu mer ich säg der grad wes be eus lauft  
mer mache em Fall de be eusne Schof nome das es weisch  
kei Ondersched zwösche schwarz ond wies be eus esch beides Gammelfleisch

D`Fusion vo de Fүүrwehre Brugg ond Wendisch die esch ed Hose natürlu  
well en jede vo dene zwe wot halt no sis egete Fүүrli  
ond jetzt send die stuure Sieche wahrschiends scho am rötle  
wer den a sim Fүүr no dörf die letschte Servalats brötle

Eusi Höchste Zwe vo der Svp lueg emol die send jo au do  
jo velle Dank Ernst Obrist ond Jürg Hunn das er höt Zobe send do an echo  
ich fend das super megageil scho fascht e Sensation  
well ich ha nähmli scho angst gha er siged au e der Oposition

Be eusem Lade em Neuquartier esch es eines Tages gscheh  
ond mer het vor luter Urwald de lgang nömme gseh  
jetzt esch es weder suber det wie neu gseht er us de Schoppe  
do händs aber ganzi Arbet gmacht eusi neu Naturschutzgroppe

Liebi Akw Gegner was er au schnöred für mech esch das paperlapapp  
ohni zuesätzlichs Atomkraftwärk werd euse Strom scho gli emol knapp  
well de Pfus du vo eim some Akw das esch mini Befürchtig  
brucht nor scho ein elei am Selanderwäg für sini Wiehnachtsbelüchtig

Wosi zwösche Cherchacker ond Broggerwald d`lezohnig vor düend neh  
do hani dänkt das werd secher einisch det en super Oeberbouig geh  
aber so wenn ich das jetze gseh do bruchi kei Brölle vom Blösser  
do wärde jo nor vo de Schrebergärte d`Höttli ächli grösser

Bem letschte Arztbsuch het mer min Dokter gseit ich heig no fasch kei Beschwärde  
ond met mim Fettvorrot won ich heig wörd ich secher honderti wärde  
was nomme honderti hani zuenem gseit potzts mech scho so gleitig  
denn ben ich jo ehner onderem Bode als eusi Starchstromleitig

Remige Brogg Zentrom Lee en Autofahrer dreyht set Stonde  
Remige Brogg Zentrom Lee e eusem Chreisel sini Ronde  
Remige Brogg Zentrom Lee ond den schloht er Krach  
jo wenn chonnt jetzt ändli gottfredstotz de Wägwiesser nach Röfenach

So nach mim letschte Bank hätti weder Dorscht ond es wört mech dromm intressiere  
wer ächt höt Zobe de Muet ufbrengt ond mer eis duet spändiere  
also mälded euch bitte bem neue Wert de Roland Kaiser hets Buffet offe  
doch bstelled ned grad 7 Fässer Wein sosch beni nochär weder bsoffe

*Der Komedi<sup>08</sup>*

Wänd er me bsueche? Ich be dehei onder „[www.komedi.ch](http://www.komedi.ch)“

D`Rämi Claudia wo am Schulrain wohnt die tuets ziehmli frustriere  
das eine wäg erne graue Cheselstei em Garte tuet reklamiere  
wart du nome het si dänkt jetz gebi no eine döre  
ond den betoniert si em Obelix sin Henkelstei no vor Töre